



**ZAPISNIK O RADU 27. SJEDNICE**  
**KOLEGIJA GRADSKOG VIJEĆA GRADA SARAJEVA**  
*ODRŽANE 01.09.2022. GODINE*

Broj: 01-GV-02-1317/22

Sarajevo, 01.09.2022. godine

Prisutni:

1. Jasmin Ademović, predsjedavajući Gradskog vijeća
2. Mirela Džehverović, zamjenica predsjedavajućeg Gradskog vijeća
3. Toni Vukadin, predsjedavajući Kluba gradskih vijećnika Naroda i Pravde
4. Vedad Deljković, predsjedavajući Kluba gradskih vijećnika Stranke demokratske akcije
5. Vedran Dodik, predsjedavajući Kluba gradskih vijećnika „SMS-Savez za Stari Grad-Srđan Srđić“
6. Adi Škaljić, predsjedavajući Kluba gradskih vijećnika Naše stranke
7. Muamer Mekić, predsjedavajući Kluba gradskih vijećnika Socijaldemokratske partije BiH
8. Marijela Hašimbegović, predsjedavajuća Kluba gradskih vijećnica „Demokratska fronta-9. Enisa Spahić-Amra Zulfikarpašić“
10. Seid Škaljić, predsjedavajući Kluba gradskih vijećnika „Narodni evropski savez (NES) - Željko Majstorović“
11. Bajro Biber, predsjedavajući Kluba gradskih vijećnika „USD-BOSS“
12. Elvedin Korora, predsjedavajući Kluba gradskih vijećnika „Korora/Skorupan“
13. Mila Eminović Rizvanović, sekretar Gradskog vijeća

Odsutan: Dragan Stevanović, zamjenik predsjedavajućeg Gradskog vijeća (najavljeno odsustvo)

Sjednici je prisustvovala Benjamina Karić, gradonačelnica Grada Sarajeva.

Sjednici je prisustvovala, po ovlaštenju Gradonačelnice, Aida Bajramović, rukovodilac Stručne službe za poslove kabineta i poslove Gradske uprave.

Sjednici je prisustvovao Elvir Hadžiahmetović, pomoćnik Gradonačelnice za lokalno poslovanje.

Sjednici su prisustvovali: Mirjana Đanović Stanić, rukovodilac Stručne službe za poslove Gradskog vijeća Grada Sarajeva, Zinaida Beširević, šef Odjeljenja za stručne poslove u Stručnoj službi za poslove Gradskog vijeća Grada Sarajeva i Amir Vrca, šef Odjeljenja za kabinetske poslove u Stručnoj službi za poslove Gradskog vijeća Grada Sarajeva.

**Jasmin Ademović, predsjedavajući Gradskog vijeća** je otvorio sjednicu u 14.15 sati, pozdravio prisutne, te konstatovao kvorum za punovažan rad i odlučivanje.

Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **jednoglasno je usvojio** Zapisnik o radu 26. sjednice Kolegija Gradskog vijeća, održane 18.07.2022. godine.



Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **jednoglasno je usvojio** dnevni red 27. sjednice Kolegija Gradskog vijeća, tako da glasi:

1. Priprema za održavanje 19. sjednice Gradskog vijeća Grada Sarajeva
2. Tekuća pitanja

#### **Ad1)**

#### **Priprema za održavanje 19. sjednice Gradskog vijeća Grada Sarajeva**

##### *a. Termin održavanja sjednice i dinamika aktivnosti u pripremi sjednice Gradskog vijeća*

Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **jednoglasno je usvojio** sljedeći zaključak:

- 19. sjednica Gradskog vijeća će se održati u **srijedu 05.10.2022. godine u Vijećnici** sa početkom u **10.00 sati**;
- Predlagači će materijale dostaviti Predsjedavajućem najkasnije u **srijedu 07.09.2022. godine do 12.00 sati**;
- Sjednice radnih tijela, u pripremi 19. sjednice Gradskog vijeća, će se održavati **od ponedjeljka 12.09.2022. godine do petka 16.09.2022. godine**;
- Pozivi gradskim vijećnicima za 19. sjednicu Gradskog vijeća će se uputiti u **utorak 20.09.2022. godine**.

**Jasmin Ademović, predsjedavajući Gradskog vijeća** je najavio da će se 28. sjednica Kolegija Gradskog vijeća, u cilju pripreme za održavanje 20. sjednice Gradskog vijeća, održati 03.10.2022. godine, a o čemu će članovi Kolegija Gradskog vijeća biti blagovremeno obaviješteni.

##### *b. Praćenje realizacije Programa rada Gradskog vijeća Grada Sarajeva*

Konstatovano je odnosno zaključeno sljedeće:

**Nacrt i Prijedlog Poslovnika Gradskog vijeća Grada Sarajeva**, čije je razmatranje na sjednicama Gradskog vijeća bilo planirano za juli odnosno septembar mjesec **nisu spremni** i neće biti uvršteni u prijedlog dnevnog reda 19. sjednice Gradskog vijeća.

**Toni Vukadin, član Kolegija i predsjedavajući Komisije za Statut i akte**, koja je ovlašteni predlagač Poslovnika Gradskog vijeća Grada Sarajeva, je istako da je potrebno da Gradsko vijeće prvo donese Statut Grada Sarajeva, te da se potom pristupi izradi Nacrta Poslovnika Gradskog vijeća Grada Sarajeva.

**Informacija o procesu donošenja urbanističkog plana urbanog područja Sarajevo (Stari grad, Centar, Novo Sarajevo, Novi grad, Ilidža i Vogošća) za period 2015.-2035. godina i obaveznoj primjeni mjera zaštite ventilacionih koridora**, prema informaciji Gradonačelnice, **nije spremna** i neće biti uvrštena u prijedlog dnevnog reda 19. sjednice Gradskog vijeća uz obrazloženje, koje je imalo sljedeći sadržaj:

U toku je izrada Urbanističkog plana, gdje je nosilac pripreme Kanton Sarajevo. Nacrt Urbanističkog plana je u pripremi od strane nosioca izrade Zavoda za planiranje razvoja Kantona Sarajevo. Studija o ventilacionim koridorima je i dalje na snazi.

Nacrt Urbanističkog plana trebao bi obuhvatiti, dati jasnu sliku o problematici ventilacionih koridora, kako bi se u konačnici otkočili procesi izrade regulacionih planova koji se nalaze u obuhvatima ventilacionih koridora.

Obzirom da je Urbanistički plan u izradi, predlažemo da se predmetna informacija ne upućuje na sjednicu Gradskog vijeća obzirom da ista neće dati jasnu informaciju po pitanju nastavka i donošenja regulacionih planova.

Predlažemo da se Informacija pripremi nakon usvajanja Nacrta Urbanističkog plana.

**Izvještaj o izvršenju Budžeta Grada Sarajeva za II kvartal 2022. godine** prema informaciji Gradonačelnice, **je spreman** i očekuje se da će biti uvršten u prijedlog dnevnog reda 19. sjednice Gradskog vijeća.

**Informacija o radu i poslovanju Javnog preduzeća za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „Sarajevo“ društvo sa ograničenom odgovornošću za period 01.01. – 30.06.2022. godine**, prema informaciji Predsjedavajućeg Gradskog vijeća, **je spremna** i dostavljena Gradskom vijeću Grada Sarajeva.

**Informacija o radu i poslovanju Javnog preduzeća „Olimpijski bazen Otoka“ d.o.o. Sarajevo za period 01.01. – 30.06.2022. godine**, prema informaciji Predsjedavajućeg Gradskog vijeća, **je spremna** i dostavljena Gradskom vijeću Grada Sarajeva.

**Informacija o radu i poslovanju Javne ustanove „Gradski muzeji“ Sarajevo za period 01.01. – 30.06.2022. godine**, prema informaciji Predsjedavajućeg Gradskog vijeća, **je spremna** i dostavljena Gradskom vijeću Grada Sarajeva.

**Prijedlog Odluke o davanju saglasnosti na Memorandum o saradnji Grada Sarajeva s Memorijalom u Nirnbergu**, prema informaciji Gradonačelnice, **nije spreman** i neće biti uvršten u prijedlog dnevnog reda 19. sjednice Gradskog vijeća uz obrazloženje koje je imalo sljedeći sadržaj:

Memorandum o saradnji između Nirnberga i Grada Sarajeva se mora prolongirati za oktobarsku sjednicu iako je bio planiran za septembar, jer Nirnberg želi potpisati Memorandum sa Gradom Sarajevom koji će potpisati gradonačelnik Nirnberga i gradonačelnica Grada Sarajeva, a kroz koji će se realizovati saradnja Informativnog centra i Memorijala u Nirnbergu. Obzirom da tekst još nije gotov i da treba prvo da ga prihvati pravna služba Grada Nirnberga, te da se, potom, materijal pripremi i dostavi Gradskom vijeću Grada Sarajeva potrebno je razmatranje Prijedloga Odluke prolongirati za okotobarsku sjednicu Gradskog vijeća.

**Benamina Karić, gradonačelnica Grada Sarajeva** je istakla da, ukoliko materijal ipak bude pripremljen do održavanja 19. sjednice Gradskog vijeća, isti će biti predložen za razmatranje.

**Nacrt Odluke o obilježavanju dana bijelih traka u znak sjećanja na žrtve ratnih zločina u Prijedoru**, prema informaciji Gradonačelnice, **je spreman** i očekuje se da će biti uvršten u prijedlog dnevnog reda 19. sjednice Gradskog vijeća.

**Prijedlog Odluke o davanju saglasnosti na Program aktivnosti za Dan obilježavanja opsade Sarajeva 1992. – 1995. za 2023. godinu**, prema informaciji Gradonačelnice, **je spreman** i očekuje se da će biti uvršten u prijedlog dnevnog reda 19. sjednice Gradskog vijeća uz napomenu da je Odluka o davanju saglasnosti na Program aktivnosti za Dan obilježavanja opsade Sarajeva 1992. – 1995. za 2022. godinu razmatrana i donesena na 12. sjednici Gradskog vijeća održanoj 23.02.2022. godine.

**Informacija o implementaciji plana djelovanja za mlade**, prema informaciji Gradonačelnice, **je spremna** i očekuje se da će biti uvrštena u prijedlog dnevnog reda 19. sjednice Gradskog vijeća.

c. *Teme koje su planirane Programom rada Gradskog vijeća Grada Sarajeva za 2022. godinu u maju i junu mjesecu*

#### **Nacrt Etičkog kodeksa izabranih i imenovanih funkcionera Grada Sarajeva**

**Jasmin Ademović, predsjedavajući Gradskog vijeća** je upoznao članove Kolegija da je, prema informacijama kojima raspolaže, Radna grupa koju je Rješenjem imenovala Gradonačelnica okončala svoj rad na izradi radnog materijala u pripremi Nacrta Etičkog kodeksa. Etičko vijeće Gradskog vijeća je 27.07.2022. godine održalo sjednicu na kojoj je razmatralo radni materijal. Ukoliko Etičko vijeće, naredne sedmice, utvrdi Nacrt Etičkog kodeksa izabranih i imenovanih funkcionera Grada Sarajeva, očekuje se da će isti biti uvršten u prijedlog dnevnog reda 19. sjednice Gradskog vijeća Grada Sarajeva.

#### **Prijedlog Statuta Grada Sarajeva**

**Toni Vukadin, član Kolegija i predsjedavajući Komisije za Statut i akte** je istako da je potrebno da Komisija za Statut i akte razmotri i očituje se o dostavljenim prijedlozima, primjedbama i sugestijama iznesenim u javnoj raspravi, a koja će biti okončana danas, utvrdi, kao ovlaštenu predlagač, Prijedlog Statuta Grada Sarajeva sa Izvještajem o provedenoj javnoj raspravi, kao i odredi se o rokovima za dostavu Prijedloga Statuta Grada Sarajeva Gradskom vijeću, na razmatranje.

#### **Prijedlog Odluke o uslovima i načinu dodjele “Šestoaprilske nagrade Grada Sarajeva”**

**Benamina Karić, gradonačelnica Grada Sarajeva** je podsjetila članove Kolegija Gradskog vijeća da je Odluka pripremana po redovnoj proceduri, odnosno razmatrana u formi nacrtu, nakon čega je bio pripremljen Prijedlog Odluke koji je povučen sa razmatranja na jednoj od prethodnih sjednica Gradskog vijeća. Shodno razgovorima i diskusiji vođenoj na sjednicama Kolegija Gradskog vijeća, formirana je Radnu grupu čiji je zadatak da pripremi konačan prijedlog ove Odluke, te će Prijedlog Odluke **biti pripremljen** za 19. sjednici Gradskog vijeća Grada Sarajeva.

*d. Novi prijedlozi:*

**Benamina Karić gradonačelnica Grada Sarajeva** je informisala članove Kolegija da će za 19. sjednicu Gradskog vijeća predložiti i sljedeće materijale:

#### **Prijedlog Odluke o davanju saglasnosti na Program aktivnosti za obilježavanje Dana sjećanja na žrtve genocida u Srebrenici** uz obrazloženje koje je imalo sljedeći sadržaj:

U Odluci o obilježavanju Dana sjećanja na žrtve genocida u Srebrenici (usvojena na 16. sjednici Gradskog vijeća Grada Sarajeva) u članu 3. propisano je da gradonačelnica Grada Sarajeva utvrđuje Program aktivnosti za Dan sjećanja na žrtve genocida u Srebrenici i najkasnije na septembarskoj sjednici predlaže Gradskom vijeću usvajanje Odluke o davanju saglasnosti na Program aktivnosti za Dan obilježavanja sjećanja na žrtve genocida u Srebrenici za narednu godinu.

**Prijedlog Odluke o pristupanju Projektu obnove i adaptacije zgrade DPO** uz obrazloženje da je materijal pripremljen u skladu sa zaključkom Gradskog vijeća Grada Sarajeva.

#### **Nacrt Plana Grada Sarajeva za prevenciju i smanjenje otpada od hrane i gubitaka hrane 2023.-2026. godina** uz obrazloženje koje je imalo sljedeći sadržaj:

Procjene pokazuju da u Bosni i Hercegovini dnevno na deponiji završi cca. 500 tona otpada od hrane. Na temelju istraživanja, zaključeno je da više od 12% dnevnog odlaganja otpada u

Kantonu Sarajevo čini otpad od hrane. S druge strane, više od 20% stanovništva u BiH živi na ili ispod apsolutne linije siromaštva.

Otpad od hrane je složen globalni problem koji donosi vrlo ozbiljne socijalne, ekološke i ekonomske posljedice koji su međusobno povezani.

Sa stanovišta cirkularne ekonomije, ispravnim postupanjem s resursima izbjegava se stvaranje otpada, a ako do njega ipak dođe, otpad može biti i vrijedan resurs.

Grad Sarajevo će po uzoru na druge gradove koji se uspješno bave ovom problematikom, predložiti i implementirati mjere za smanjenje i sprečavanje otpada od hrane i gubitaka hrane. Cilj ovog strateškog dokumenta je predložiti rješenja koja pomažu u smanjenju otpada od hrane te kreirati sinergiju sa svim akterima koji mogu dati doprinos u rješavanju ovog značajnog problema.

Dokument je fokusiran na teritoriju Sarajeva na kojem je planirana analiza i tretiranje ove problematike. Grad Sarajevo ima za cilj usvojiti mjere i aktivnosti sprečavanja otpada i gubitaka od hrane, a koje bi mogle biti implementirane i u drugim dijelovima Bosne i Hercegovine.

U raspravi koja je uslijedila učestvovali su **članovi Kolegija Seid Škalji i Adi Škaljić**, a dodatna pojašnjenja dala je **Benamina Karić, gradonačelnica Grada Sarajeva**.

**Prijedlog Odluke o davanju saglasnosti za kandidovanje Grada Sarajeva za program Evropska prijestolnica demokratije - European Capital of Democracy uz obrazloženje koje je imalo sljedeći sadržaj:**

Kroz učestvovanje u pomenutom programu, a kroz saradnju sa drugim evropskim gradovima, Grad Sarajevo će, kao glavni grad Bosne i Hercegovine, biti lider u kreiranju i uspostavi demokratskih principa i inovativnih rješenja, što ovu inicijativu čini vrlo značajnom za Grad Sarajevo.

Program Evropska prijestolnica demokratije je program koji traje jednu godinu u kojoj će se održavati mnogi događaji u gradu koji će nositi titulu Evropske prijestolnice demokratije uključujući i ceremoniju dodjele nagrade Inovacije u politici, kao i ActNOW međunarodnu konferenciju gradonačelnika.

Grad nosilac titule Evropske prijestolnice demokratije će biti odabran nakon glasanja 10.000 stanovnika evropskih gradova.

Slijedom naprijed navedenog, Grad Sarajevo izražava spremnost da učestvuje u Programu Evropska prijestolnica demokratije, te da svoj nemjerljiv doprinos u razvoju demokratije u Sarajevu, Bosni i Hercegovini, a kroz saradnju sa drugim evropskim gradovima i u Europi.

**Prijedlog Odluke o davanju saglasnosti gradonačelnici Grada Sarajeva za potpisivanje Memoranduma o razumijevanju između Grada Rima (Republika Italija) i Grada Sarajeva (Bosna i Hercegovina)**

**Prijedlog Odluke o stavljanju van snage Odluke o dodjeli u zakup poslovnog prostora u ulici Dejzina Bikića broj 4 ulaz 3.** uz obrazloženje koje je imalo sljedeći sadržaj:

Obzirom da je raskinut Ugovor o dodjeli u zakup predmetnog prostora sa zakupcem predmetnog prostora, potrebno je Odluku koju je donijelo Gradsko vijeće i po osnovu koje je i zaključen Ugovor koji je predmetom raskidanja, staviti van snage.

Ad 2)

**Tekuća pitanja**

**Prijedlog za održavanje SDG skupa (odnosno sastanka Vijeća za praćenje realizacije Ciljeva Održivog razvoja u Bosni i Hercegovini sa Grad Sarajevo, Općina Centar, Općina Novi Grad, Općina Novo Sarajevo, Općina Stari Grad, Općina Ilidža) u srijedu 12.10.2022. godine.**

**Jasmin Ademović, predsjedavajući Gradskog vijeća** je podsjetio članove Kolegija Gradskog vijeća da je na 17. sjednici Gradsko vijeće dalo saglasnost za potpisivanje Memoranduma o saradnji s Federalnim zavodom za programiranje razvoja s ciljem saradnje u procesu implementacije ciljeva održivog razvoja UN-a u Gradu Sarajevu.

Istako je da su članovi Kolegija Gradskog vijeća upoznati, na prethodnim sjednicama Kolegija, da je skup na kome bi se razmatrala implementacija ciljeva održivog razvoja u lokalnim zajednicama, trebao biti održan u Vijećnici, 21.07.2022. godine, no zbog objektivnih okolnosti i nemogućnosti prisustva načelnika gradskih općina, odgodili smo održavanje i obavezali se isti događaj održati u mjesecu oktobru i o tome formalno obavijestili Federalni zavod za programiranje razvoja koji zapravo saraduje s nama u organizaciji ovog sastanka odnosno događaja.

Upravo se u mjesecu oktobru odnosno od 10.10. do 14.10. održava četvrta po redu Sedmica održivog razvoja kao skup više događaja koji se održavaju širom Bosne i Hercegovine. Sedmica ima za cilj podići svijest i uključiti ključne publike u rasprave o novim trendovima u upravljanju i lokalizaciji održivog razvoja, potičući dekarbonizaciju, inovacije i pametan ekonomski rast, kao i dati doprinos stvaranju društva jednakih mogućnosti. Jedan od događaj u okviru ove sedmice, u organizaciji UN-a, odnosno UNDP-je skup opredijeljen implementaciji ciljeva u lokalnim zajednicama. Idealan trenutak je da održimo taj događaj u Vijećnici.

S tim u vezi je predložio da Kolegij Gradskog vijeća donese zaključak kojim će podržati organizaciju ovog skupa u Vijećnici, te da se uputi sugestija Gradonačelnici da što je prije moguće uspostavi kontakt sa Federalnim zavodom, kako bi se na vrijeme izvršile potrebne pripreme za održavanje ovog skupa i učestvovanje Grada Sarajeva u njegovom radu, a sve u skladu sa Memorandumom o saradnji između Federalnog zavoda za programiranje razvoja i Grada Sarajeva, za čije je potpisivanje Gradsko vijeće Grada Sarajeva dalo saglasnost na 17. sjednici Gradskog vijeća održanoj 29.06.2022. godine.

Na prijedlog **Jasmina Ademovića, predsjedavajućeg Gradskog vijeća**, Kolegij Gradskog vijeća, bez rasprave, **jednoglasno je usvojio** sljedeći zaključak:

**Kolegij Gradskog vijeća podržava organizaciju jednog od skupova u okviru sedmice održivog razvoja koja će se održati u Sarajevu između 10.10 i 14.10.2022. godine, a skup kojem bi Grad Sarajevo bio domaćin u Vijećnici održati će se 12.10.2022. godine. Ova sedmica je zajednički pothvat UN agencija u Bosni i Hercegovini, a koordinaciju vodi UNDP-ov Program provođenja okvira za realizaciju SDG u Bosni i Hercegovini u održivi i inkluzivni rast. Cilj skupa u Vijećnici je razmatranje teme „Implementacija ciljeva održivog razvoja u lokalnoj zajednici“. Učešće u radu skupa će uzeti i Grad Sarajevo.**

**Kolegij Gradskog vijeća upućuje sugestiju Gradonačelnici da što je prije moguće uspostavi kontakt sa Federalnim zavodom za programiranje razvoja, kako bi se na vrijeme izvršile potrebne pripreme za održavanje ovog skupa i učestvovanje Grada Sarajeva u njegovom radu, a sve u skladu sa Memorandumom o saradnji između Federalnog zavoda za programiranje razvoja i Grada Sarajeva, za čije je potpisivanje**

**Gradsko vijeće Grada Sarajeva dalo saglasnost na 17. sjednici Gradskog vijeća održanoj 29.06.2022. godine.**

\*\*\*\*

**Toni Vukadin, član Kolegija** je uputio i obrazložio inicijativu kojom je predložio Gradonačelnici da za sljedeću sjednicu Gradskog vijeća pripremi i predloži odluku kojom će se Informativni centar reorganizovati u gradsku upravnu organizaciju koja će u potpunosti provoditi mandat koji je definisan Memorandumom o razumijevanju. Istakao je da je sada vrijeme za to jer će u narednim mjesecima biti definisani programi rada i budžet za narednu godinu te da u tome treba da učestvuje i Centar organizovan kao efikasna gradska upravna organizacija sa određenim stepenom samostalnosti obzirom na specifične poslove koje treba provoditi. Također je napomenuo da bi, u smislu člana 62. stav 1. Zakona o organizaciji organa uprave u Federaciji Bosne i Hercegovine, Centrom, kao gradskom upravnom organizacijom, rukovodila Gradonačelnica, te bi u tom smislu bila zadovoljena odredba tačke 1.5. Memoranduma o razumijevanju gdje je propisano da Centrom upravlja gradonačelnik.

Zamolio je Gradonačelnicu da se izjasni o inicijativi, te ukoliko odgovor bude negativan inicijativu će predložiti na sjednici Gradskog vijeća, te zatražiti da se Gradsko vijeće o istoj izjasni.

**Benjamina Karić, gradonačelnica Grada Sarajeva** je prihvatila i podržala inicijativu te istakla da će za 19. sjednicu Gradskog vijeća pripremiti i dostaviti Prijedlog Odluke u cilju realizacije navedene inicijative.

**Članica Kolegija Marijela Hašimbegović** je napustila sjednicu Kolegija u 14 i 50 sati.

U raspravi koja je uslijedila učestvovali su članovi Kolegija: **Mila Eminović Rizvanović, sekretar Gradskog vijeća, Vedad Deljković, Toni Vukadin i Seid Škaljić**, a dodatna pojašnjenja dale su **Benjamina Karić, gradonačelnica Grada Sarajeva i Aida Bajramović**, rukovodilac Stručne službe za poslove kabineta i poslove Gradske uprave.

**Član Kolegija Vedran Dodik** je napustio sjednicu Kolegija u 15 i 02 sati.

\*\*\*\*

Obzirom da pod ovom tačkom dnevnog reda nije bilo prijedloga za raspravu, **Jasmin Ademović, predsjedavajući Gradskog vijeća** je zaključio sjednicu Kolegija Gradskog vijeća u 15.05 sati.

*SEKRETAR GRADSKOG VIJEĆA*

*Mila Eminović Rizvanović, s.r.*

*PREDSJEDAVALJUĆI GRADSKOG VIJEĆA*

*Jasmin Ademović, s.r.*